

Nd.

38. Frumvarp til laga

um breyting á lögum nr. 68 28. des. 1934, um útvarpsrekstur ríkisins.'

Flm.: Thor Thors, Garðar Þorsteinsson, Gísli Sveinsson.

1. gr.

2. málsg. 3. gr. laganna orðist svo:

Kennslumálaráðherra skipar ennfremur aðra starfsmenn við ríkisútvarpið og ákveður laun þeirra, í samræmi við launakjör annara svipaðra starfsmanna ríkisins, að fengnum tillögum útvarpsstjóra. Þó skulu þeir fastráðnir starfsmenn, sem vinna listræn störf, fræðslu- og fréttastörf við útvarpið, valdir eftir tillögum útvarpsráðs.

2. gr.

4. gr. laganna orðist svo:

Útvarpsráð skipa sjö menn. Skulu þrír þeirra og þrír til vara kosnir hlutfallskosningu á Alþingi til fjögurra ára í senn, og fjórir og fjórir til vara sömu-leiðis kosnir hlutfallskosningu meðal allra þeirra, sem útvarpsnotendur teljast og greitt hafa lögmælt gjöld samkvæmt lögum þessum.

Eftir að kosning í útvarpsráð hefir farið fram á Alþingi, felur ráðuneytið skrifstofu ríkisútvarpsins að annast um, að fram fari kosning af hálfu útvarpsnotenda.

Heimilt er félögum útvarpsnotenda og einstökum útvarpsnotendum að bera fram kjörlista. Skulu á hverjum lista vera nöfn átta manna, þeirra er kjörgengir eru, og fylgi hverjum lista meðmæli að minnsta kosti 200 útvarpsnotenda. Kjörgengur er hver sá útvarpsnotandi, sem greitt hefir lögmælt gjöld samkvæmt lögum þessum. er ekki fastráðinn starfsmaður ríkisútvarpsins og er búsettur í Reykjavík eða svo nálægt Reykjavík, að hann geti tekið þátt í störfum útvarpsráðs.

Kennslumálaráðherra ákveður í reglugerð nánar um tilhögun kosningarinnar og talningu atkvæða, enda sé fulltrúum útvarpsnotenda tryggður réttur til eftirlits með kosningunni.

Kosningu þessari skal vera lokið þegar þrjú mánuðir eru liðnir frá því er kosning í útvarpsráð fer fram á Alþingi, og tekur þá hið nýkjörna útvarpsráð við störfum.

Útvarpsráð kýs sér formann og ritara.

Nú koma ekki fram við kosningu í útvarpsráð af hálfu útvarpsnotenda neindir kjörlistar, og ferst kosning þá fyrir. Skipar þá kennslumálaráðherra fjóra menn í útvarpsráð af hálfu útvarpsnotenda til næstu fjögurra ára.

3. gr.

1. másl. 1. málsgr. 5. gr. laganna orðist svo:

Útvarpsráðið hefir yfirstjórn hinnar menningarlegu starfsemi útvarpsins og ræður útvarpsefni.

4. gr.

Lög þessi öðlast þegar gildi.

Ákvæði til bráðabirgða.

Kosning þriggja manna í útvarpsráð og þriggja til vara samkvæmt 2. gr. skal fara fram á því þingi, sem samþykkir þetta frumvarp. Fer þá um kosningu af hálfu útvarpsnotenda svo sem fyrir er mælt í 2. gr. Fellur þá jafnframt niður umboð núverandi útvarpsráðs.

Greinargerð.

Þær breytingar, sem frv. þetta ráðgerir á gildandi lögum um útvarpsrekstur ríkisins, eru í fyrsta lagi þær, að auka valdsvið útvarpsráðs og kveða skýrar á um það, og í öðru lagi að breyta um tilhögun kosninga í útvarpsráð. Nú kýs Alþingi 3 menn í útvarpsráð, útvarpsnotendur kjósa 3, en kennslumálaráðherra skipar 1, sem er formaður ráðsins. Þessu viljum við breyta á þann veg, að Alþingi kjósi 3, en útvarpsnotendur 4. Við teljum rétt, að útvarpsnotendur, sem með afnotagjöldunum bera uppi starfsemi útvarpsins, ráði mestu um stjórn þessarar stofnunar. Réttur útvarpsnotenda til kosninga meiri hluta útvarpsráðs gæti orðið til þess að draga verulega úr þeirri óánægju og tortryggni, sem frá fjölda útvarpsnotenda gætir í garð útvarpsins vegna frétt aflutnings og jafnvel fræðslustarfsemi þess.